

**UNIVERZITET U TUZLI**

**PRAVILNIK  
O REPREZENTACIJI I POKLONIMA**

**Tuzla, januara 2014. godine**

Na osnovu člana 18. stav (1) tačka a) Zakona o Univerzitetu u Tuzli („Službene novine Tuzlanskog kantona“ broj: 9/08, 8/10 i 7/11) i člana 72. stav (1) tačka c) Statuta Univerziteta u Tuzli (Prečišćeni tekst), a u vezi sa članom 16. stav 1. Uredbe o reprezentaciji i poklonima u kantonalnim organima uprave, kantonalnim upravnim organizacijama i drugim budžetskim korisnicima („Službene novine Tuzlanskog kantona“ broj: 16/13), Upravni odbor Univerziteta u Tuzli, na prijedlog Rektora, na sjednici održanoj 06.01.214. godine donio je

## **PRAVILNIK O REPREZENTACIJI I POKLONIMA**

### **I OPĆE ODREDBE**

#### **Član 1.**

Ovim Pravilnikom uređuje se visina sredstava reprezentacije, korištenje sredstava reprezentacije, procedura i pravila primanja i davanja poklona te vođenje evidencije o primljenim poklonima na Univerzitetu u Tuzli (u daljem tekstu: Univerzitet).

#### **Član 2.**

Pod reprezentacijom se podrazumijeva izdatak koji se javlja u toku redovnog poslovanja Univerziteta, sa ciljem ostvarenja i održavanja poslovnih odnosa, te obilježavanja godišnjica i drugih značajnih događaja.

Sredstva za reprezentaciju su sredstva za troškove jela, pića i osvježenja koja se služe tokom radnih sastanaka, karte za sportske i kulturne događaje, troškovi za kupovinu cvijeća i vijenaca i druge robe, troškovi izrade fotografija, usluge smještaja u smještajnim objektima i druge usluge.

Poklonom se smatra lična korist u vezi vršenja javne funkcije te funkcije na Univerzitetu, funkcije na drugim univerzitetima u zemlji i inostranstvu, funkcija u okviru rektorskih konferencija i drugih akademskih asocijacija, a podrazumijeva stvari, prava, usluge bez naknade te neku drugu ličnu korist datu nosiocu funkcije, kao i svaku isplatu, djelovanje, uslugu ili predmet od vrijednosti učinjene izravno primaocu, bez naknade ili očekivane naknade.

### **II VISINA SREDSTAVA REPREZENTACIJE I POKLONA**

#### **Član 3.**

Visinu reprezentacije na Univerzitetu određuje Ministar obrazovanja, nauke, kulture i sporta Tuzlanskog kantona posebnom odlukom, u skladu sa usvojenim budžetom i raspoloživim finansijskim sredstvima, posebno za svaku budžetsku godinu.

#### **Član 4.**

Rashodi na ime reprezentacije i poklona mogu se izvršiti najviše do ukupnog iznosa koji je odobren u budžetu za godinu u kojoj se koristi.

### **III KORIŠTENJE SREDSTAVA REPREZENTACIJE**

## **Član 5.**

Sredstva reprezentacije utvrđuju se kao:

1. eksterna reprezentacija za institucije i organizacije iz stava 2. ovog člana i njihove predstavnike i istaknute pojedince i
2. interna reprezentacija za rektora i lica koja on ovlasti.

Institucije i organizacije u smislu ovog Pravilnika su: univerziteti u zemlji i inostranstvu, rektorske konferencije, druge akademske asocijacije, državne institucije i organizacije Bosne i Hercegovine, entiteta, kantona, općine i Brčko Distrikta Bosne i Hercegovine, državne institucije drugih država te međunarodne organizacije i institucije.

## **Član 6.**

Rektor koristi sredstva reprezentacije bez ograničenja, razumno i primjereno, vodeći računa o raspoloživim sredstvima za reprezentaciju.

U slučaju da lica ovlaštena od strane Rektora za korištenje sredstava reprezentacije prekorače dozvoljeno ograničenje, dužna su dostaviti pismeni izvještaj o prekoračenju, na osnovu kojeg će Rektor procijeniti da li je prekoračenje opravdano ili nije.

Ukoliko Rektor, u smislu prethodnog stava ovog člana, ocijeni da je prekoračenje neopravdano, donijet će posebno rješenje o obustavi od plaće prekoračenog iznosa sredstava reprezentacije.

Posebnom odlukom Retora određuju se krug lica koja imaju pravo na korištenje sredstava reprezentacije kao i iznos sredstava reprezentacije koja ta lica mogu koristiti u tekućoj budžetskoj godini po vrstama reprezentacija.

## **Eksterna reprezentacija**

### **Član 7.**

Korištenje sredstava eksterne reprezentacije mora biti razumno i primjereno, vodeći računa o uslovima i prilikama, te o statusu lica, a može se koristiti u inostranstvu i na teritoriji Bosne i Hercegovine, uključujući i samo sjedište Univerziteta.

Pravo na korištenje sredstava reprezentacije u inostranstvu ima Rektor i lica koje on ovlasti.

Pravdanje korištenja sredstava reprezentacije vrši se podnošenjem pismenog izvještaja uz koji se prilaže odgovarajući račun.

### **Član 8.**

Pismeni izvještaj iz člana 7. stav 3. ovog Pravilnika sadrži datum, mjesto i svrhu korištenja sredstava reprezentacije.

Računi davaoca usluga moraju biti originalni i naknadno odobreni potpisom ovlaštenog lica.

## **Interna reprezentacija**

### **Član 9.**

Interna reprezentacija odnosi se na korištenje sredstava reprezentacije prilikom obavljanja redovnih poslova na Univerzitetu.

Interna reprezentacija odnosi se i na korištenje sredstava reprezentacije prilikom održavanja sjednica organa Univerziteta.

#### **Član 10.**

Pravo na reprezentaciju iz člana 9. stav 1. ima Rektor kao i lica koja on ovlasti. Reprezentaciju iz člana 9. stav 2. odobrava Rektor ili lice koje on ovlasti.

### **IV PROCEDURE I PRAVILA PRIMANJA I DAVANJA POKLONA**

#### **Član 11.**

Kod primanja poklona mora biti jasno utvrđeno da li su oni namijenjeni Univerzitetu ili Rektor.

Univerzitet će primiti poklone, nezavisno o njihovoj vrijednosti, kada je to u skladu s propisima i kada ne postoje neki politički ili ekonomski razlozi zbog kojih ih ne bi trebalo primiti.

Rektor ne smije zadržati poklon čija tržišna vrijednost prelazi 200,00 KM, te je isti dužan prijaviti i predati Univerzitetu.

#### **Član 12.**

Zaposlenicima Univerziteta nije dozvoljeno primanje poklona od trećih lica, osim u korist Rektora, s time da isti mora znati za primanje poklona.

Zaposlenik iz prethodnog stava ovog člana dužan je pridržavati se odredaba o primanju poklona iz ovog Pravilnika i Zakona o sukobu interesa u organima vlasti u Federaciji Bosne i Hercegovine ("Službene novine Federacije BiH", broj: 70/08).

#### **Član 13.**

Univerzitet može dodjeljivati poklone institucijama i organizacijama, kao i predstavnicima institucija i organizacija iz člana 5. stav 2. ovog Pravilnika, prilikom protokolarnih posjeta, u povodu jubileja tih institucija i organizacija, njihovog posebnog doprinosa u razvoju pojedinih oblasti i projekata, te po isteku mandata predstavnicima međunarodnih institucija i organizacija, kao i istaknutim pojedincima, koji su svojim radom i rezultatima rada doprinosili afirmaciji Bosne i Hercegovine, Tuzlanskog kantona, odnosno Univerziteta.

O davanju poklona u navedenim situacijama, odlučuje Rektor.

#### **Član 14.**

Pokloni za predstavnike institucija i organizacija iz člana 5. stav 2. ovog Pravilnika utvrđuje se u iznosu do 500,00 KM.

### **V EVIDENCIJA PRIMLJENIH POKLONA**

#### **Član 15.**

Univerzitet je dužan voditi evidenciju primljenih poklona čija tržišna vrijednost prelazi iznos iz člana 11. stav 3. ovog Pravilnika.

Evidencija primljenih poklona sastoji se od slijedećih rubrika:

1. redni broj,

2. podaci o poklonodavcu, potpis poklonoprimeca ili lica ovlaštenog za čuvanje poklona,
3. vrsta, količina i vrijednost poklona,
4. datum i mjesto prijema poklona,
5. mjesto gdje se čuva primljeni poklon.

Vrijednost poklona u smislu ovog člana utvrđuje Univerzitet na osnovu računa, provjerom vrijednosti istog ili sličnog poklona na tržištu ili izjavom poklonodavca koja može biti usmena ili pismena, ali ne i posebno zahtijevana.

## **VI ZAVRŠNE ODREDBE**

### **Član 16.**

Ovaj Pravilnik stupa na snagu danom donošenja.

### **Član 17.**

Stupanjem na snagu ovog Pravilnika prestaje da važi Pravilnik o poklonima i reprezentaciji broj: 04-8870-3.4/11 od 27.10.2011. godine.

UNIVERZITET U TUZLI  
Broj: 04-9825-2/13  
Tuzla, 06.01.2014.godine

PREDSJEDNIK  
UPRAVNOG ODBORA:

Akademik prof.dr.sc. Enver Zerem